

**SESSIONI URDINARIA DI U 10 DI MARZU DI U 2022**

**RIUNIONI DI U 10 DI MARZU DI U 2022**

**N° 2022 /M3/01**

**QUISTIONI URALI DIPUSITATA DA JEAN-PHILIPPE CASALTA, NON ISCRITTU,  
A A DESTINAZIONI DI GILLES SIMEONI, PRESIDENTI DI U CUNSIGLIU  
ESECUTIVU**

**Ughjettu : Magnà hè bè. Pinsà lucali hè meddu.**

O sgiò Presidenti, Cari Cunsiglieri,

« Pà magnà bè, ùn hè micca ubligatoriu di magnà bio ». Hè ciò chì dicia Jean-Pierre Coffe, ch'ùn prisintemu più, ind'u 2008.

A leggi Egalim di u 30 d'uttrovi di u 2018 veni à dà cuntradizioni à u nosciu criticu culinariu naziunali.

In fatti, issu testu imponi, in i cantini sculari, 50% di prudutti durevuli è di qualità, da i quali 20% di prudutti isciuti da l'agricultura biologica à u 1<sup>er</sup> di ghjinnaghju di u 2022. Da quì à u 1mu di ghjinnaghju di u 2024, sarani imposti 60% di prudutti durevuli è di qualità pà i pesci è i carri (testu cliumatu è resilienza).

In Corsica, l'autunumia alimentaria hè di 2%, val'à di chì sulamenti 2% di ciò chì no magnemu hè pruduttu ind'a noscia righjoni. Issu tassu hè simili à quiddu chì si trova annantu à l'insemi di u tarritoriu naziunali.

I leggi surtiti ci imponini di reagiscia annantu à trè canali.

U primu canali saria a pussibilità pà a Cullettività di cumprà incù u « droit de préemption » tarreni agriculi vicini à i stabilimenti sculari, impiantà agriculatori è crià un ligami sopratuttu incù i classi di sesta è di

quinta. A pulitica saria quidda di pudè crià una struttura di distribuzioni cumuna à i merrii è altri stabilimenti pubblici pà i prudutti durevuli, lucali è bio prudutti à u chilometru 0. Di issa manera, i tarreni pubblici sariani usati pà suddisfà l'insemi di i ziteddi di a noscia righjoni incù un costu limitatu pà tutti.

U sicondu canali hè u prezzu di vendita. In fatti, in un stabilimentu Corsu, u prezzu mediu di un ripastu era di 3.27 euro in u 2020, incù un minimu di 2.30€ è 3.60 € à u massimu. U prublemu hè chì a cullettività hà impostu à i so stabilimenti di lascià i prezzu stabili in u 2022, malgradu à l'inflazioni è à i novi ubligazioni legali d'acquisti bio. Par asempiu, i meli cunvenziunali sò vinduti à 1.99€/kg è i meli bio - omancu locali o naziunali - à u menu à 3.99€/kg. Hè impussibili di venda ripasti di qualità à issi prezzu cusì bassi senza limità a qualità di i prudutti preparati.

Piccola parentesi : Parlaiu qualchi tempi fa incù i nosci paisani di Livesi di a quistioni di i costi fissi in i cantini. A verità hè chì costa caru di crià una stallazioni à i normi, fà puliscia i lochi, rispittà l'HACCP ecc, soprattuttu pà una cantina chì accogli pochi parsoni (<40/50). Issi costi fissi si aghjunghjini à l'ubligazioni di prudutti di qualità (costi variabili).

Riturnendu à a quistioni di i prezzu di i ripasti vinduti, saria bè - à u me solu parè - di fissà pà 5 anni un prezzu par tutti – in tutti i stabilimenti sicundarii - à 4€. Incù l'inflazioni, l'ubligazioni di cumprà prudutti bio à un prezzu guasgi doppiu rispettu à a filiera tradiziunali, saria una pussibilità pà l'EPL di pudè venda di manera sicura ripasti di qualità. Ben intesu, iss'aumentazioni saria cumpensata da fondi suciali crisciuti pà parsoni in u bisognu è massimi ubligazioni di risultati.

U terzu canali hè a leggi 3DS. In fatti, l'aghjonti gestunarii di i culleghji è i licei avarani un'auturità funziunali di i cullettività lucali (quì a CTC) annantu à u tratenimentu di i bastimenti o a cantina.

Chì pinseti fà d'issa auturità funziunali dopu à a firma di « l'accords-cadres » incù i stabilimenti ? Pinseti à metta in baddu una pulitica cum'è a quali vi aghju dittagliatu trè punti? O, à u cuntrariu, pinseti piuttosto dà a restaurazioni à u settori privatu à longu termini?

Dopu à issi quistionamenti, cuncludaraghju pà una citazioni piena di sensu di Roosevelt « U primu di i diritti di l'omu hè di pudè magnà à a so fami ».

Vi ringraziu mori.

